



Al jere di vuardie su chê alte e lungje montagne cun chês scarpis un fregul largjis e chel vistît che lu parave pôc dal aiar, voluçât però tune mantele.

Al jere di vuardie cuintri il Nemî. Il Nemî. Cuintri chei mûcs e chei sclâfs che a jerin compagns di lui, cun doi braçs e dôs mans, la stesse muse scuride dal soreli, lis stessis mans, lis stessis preieris. La uniche robe che a vevin di diferent e jere che a fevelavin une altre lenghe.

Ma a Rome a vevin decidût che chei là sù a jerin il Nemî e che bisugnave tradî la Austrie-Ongjarie, prime di chê volte aleade, par fâ tornâ tal grim de Italie Trent e Triest... che, a pensâ ben... cuant jerino stadis talianis?

I nazionaliscj, i grancj industriâi, i bancjîrs, i filibustîrs des armis a vevin dit une sole peraule. VUERE!

E lui al jere partît. Scugnî lâ...

Cui sa ce chel al pensave cuant che i rivà chê fusilade. No si sa di ce bande. Scûr. Plui nuie. Nuie Univiers e nuie Paradîs. Nuie di nuie.

Eh... no! I dediarin une vie de citât... sbaliant il cognon ma va be'... nissun al è perfet.

Però trops di chei cent mil abitants di cumò sano che il non di chê vie al è chel di un anonim fantacin de prime grande inutile vuere mondiâl?

Us confessi une robe... prime di jessimi documentât... no lu savevi nancje jo!

**di Checo Tam**

### Zonte storiche

*...za aes 2 di gnot però, une compagnie sielte di soldâts furlans dal bataon alpins "Cividât" si movè in anticipi par cjapà la mont Natpriciar, denant Tulmin, passant cun cidinôr par il Pas Zagradan, ma i 14 gjendarmis de Austrie Ongjarie che si cjatavin al valic a spararin cuintri il*

*grup talian e a fo copât l'alpin furlan di leve Riccardo Di Giusto, udinês di vincj agns: al fo lui il prin a talian a murî inte vuere, e il Comant Suprem lu decorâ di corte cu la medaie di aur a valôr militâr...*